

idem probabile volunt esse, non certum?

*Hæc si tu postules*

*Ratione certa facere, nihilo plus agas,*

*Quam si des operam, ut cum ratione insaniant.*

Ergo Mysterium sententia Pontificis finiatur oportet, ut Ecclesiam vexare aliquando desistant, qui se filios ejusdem, ac fortissimos vindices profitentur.

Nunc, argumenti vitio patefacto, singulas ejus propositiones more nostro expendamus. *Definitio alicujus propositionis ex cathedra reddit contrariam erroneam, & falsam.* Etiam *hereticam* debuisset adjungere. Est enim hæretica propositio, quæ cum Catholica veritate pugnat. Quod autem pertinet ad religionem, idemque ex cathedra definitur, Catholica veritas est. Pontifex enim, quod erat antea per se verum, nec tamen populo Christiano exploratum, finiendo declarat id esse verum, nitique Dei testimonio, qui revelavit. Quod autem Deus, Vicario ejus docente, revelavit, Catholica veritas est. Erit igitur non modo falsa, & erronea, sed etiam per se hæretica propositio, quæ ab homine Christiano enuntiata definitioni adversatur. Continet enim summum gradum erroris in re pertinentem ad religionem. Quippe negat id esse verum, quod Ecclesiæ est patefactum a Deo, qui nec fallere, nec falli potest: Dixi *per se*, ut nominis controversiam declinarem. Nam cum hæretica propositio est flagitiosa, ad enuntiantis ingenium, conditionem, doctrinam, & culpam refertur; eumque designat, qui vel illa affirmanda pertinax est, vel ignorantiam veritatis affectat, nec paratus est, cum ab Ecclesia corrigetur, errorem suum ipse corrigere.

Dicet aliquis: Non omnis Ecclesiæ definitio eodem loco habenda est, nec judiciorum Pontificis idem est gradus. Non enim solum quis de qua re judicium ferat, animadvertendum est, sed quæ verborum proprietates, & pondus. Itaque ut Pontificis definitio sit Catholica veritas, constare debet hujusmodi verbis, quibus tamquam notis internotis  
G  
queat: